

做 醮

許正勳

(桃紅字：表聲音內容)

冷閣寒的北風，一陣一陣透無停。幾枝輕蠓蠓仔的稻草，佻一寡焦(ta)黃的樹葉仔，隨風飄零，揣無所在安身歇暍。

庄內幾條平常時仔較鬧熱的路--裡，冷冷清清，恬寂寂(tsih-tsih)，人少車也少。白死殺的水銀燈，射出冷酷無情的光，照著今才(tann-tsiáh)鋪好打馬膠、烏烏的路面，毋知真正是執政的人的「德政」？抑是選舉期間虛情假意，為著選票用這款的步數來收買人心，講好聽話——造福鄉親？水銀燈跔，一个穿厚棉裘戴膨紗帽仔的人影行--過，頭勾勾雙手插仔褲袋仔--裡，三步做兩伐(huáh)，一目nih仔就消失仔較遠暗暗的路尾。

路的雙月邊仔，縛仔電火柱頂懸兩大排，牽甲脹脹長，一葩接一葩相連繼，遠遠看去敢若(kánn-ná)一粒一粒焦痛(ta-pôo)的蘋果貫規揸、塑膠做的醮仔燈，放出洪黃的光，死bái仔死bái，佇寒夜隨風搖動，不時傳出真幼真小的聲，細細聲仔，毋知in咧講啥？一隻著癩ko病的流浪狗，寂寞孤單揣無伴，枵飢失頓兼畏寒，規身軀唵唵掣(phiah-phiah-tshuah)，一步一步艱苦行，行到無佬遠、毋知啥人兜、暗氈(sàm)的低牆仔跔，覆仔遐覷寒，無人看見，無人收留照顧，是毋是會當度過今夜？連伊家己嘛毋知影。

寒天較早暗，今仔日天氣閣有較寒。才暗時仔八點外爾爾，添旺伯仔開的老kám仔店，關甲賭一縫仔。添旺伯仔佻in牽手兩個老翁公婆仔，穿厚衫覷仔店仔內咧看電視。無佬久，老浩浩的舊時鐘懶趨懶趨損九聲，精彩的歌仔戲齣做煞，拄欲起來關門歇暍，搪著一个少年家仔來搨門。阿伯仔看伊面帶憂愁，毋知啥原因。少年家喙猶未開，老阿伯就趕緊開門予伊入去，叫伊坐--落來，先哈一杯燒茶，才共伊問：「阿勳仔，外口遐爾寒，閣遮爾暗--矣，你欲來買啥？」少年的無啥聲尾應講：「無--啦，我無欲買啥，我是專工來欲佻阿伯參詳，這擺咱庄--裡欲做醮，就愛辦桌請--人，阮兜散赤無錢，我猶咧讀冊，一冬愛納兩期的學費，阮阿母叫我來請問阿伯，敢會當先借阮兩萬箍？抑是予阮先賒一寡拜拜愛用的物件？」阿勳仔是一个純樸的學生囡仔，想著三年一科的做醮，逐擺攏愛開不止仔濟錢，干焦(na)備辦普渡用的牲體、四果、茶碗佻紙料，就食袂消--囉，何況家家戶戶閣愛辦桌請人客，而且是食免驚的流水席！對散凶無錢的人真殘忍，袂輸千斤萬斤的重擔誓仔肩胛頭，欲擔，擔袂起；欲放，閣放袂去！

做醮上蓋要緊頭一層(tsân)，燈篙的確愛倚予懸懸懸，絕對袂使違背傳統古慣。鑼聲響，鼓聲動！廟埕正中央tshāi五大檟，燈篙倚足爾仔懸，聽講有兩丈外三四尋(siam)，欲招遠方孤魂野鬼來食一頓飽，順繼觀賞人間陽世的奇巧(khá)！對開醮彼一工起，司公道士仔唸經日佻暝，聲聲句句唸欲超拔亡魂、渡眾生，祈求蒼天開恩赦罪、護國佑民。到底是真？抑是假？從到今(tsing-kàu-tann)無人認真去查詳細，敢會是——恐驚冒犯了神明？規个廟埕鬧猜猜，各種陣頭藝閣齊(tsiâu)來到，東西南北拚佻鬥，宋江陣、蜈蚣陣、

牛犁仔歌、弄車鼓.....挨挨陣陣巡遊各庄頭。上蓋怪奇是廟口！佇曠闊的廟埕斗，干焦戲棚就搭幾若台，按倒手片算起，這棚咧搬傳統歌仔戲，阿公、阿媽、阿姆、阿嬭、阿娘、阿爸，看甲誠趣味；隔兩三步仔，咧演金光布袋戲，大人、囡仔、查埔、查某，看甲頭khi-khi；閣過--去，無夠三伐跋，也有現代歌舞『show』鬥鬧熱，開公錢，免驚疑！重金聘請當今有名的紅歌星來獻唱，in的廬山真面目，現場看會著！一寡少年歌迷，看甲喙笑目笑，又閣大聲佇咧喝叫！廟--裡主事老大按呢講：若無按呢做，會予人看衰兼恥笑，恥笑咱綴時代袂著！上蓋尾仔彼棚較小局，卻是吸引上濟的觀眾！脫衣女郎毋驚寒？為著顧三頓？褪甲光光光，看甲男女老幼目調起烟暈(ian-n̄g)！無仝戲棚幾若台，攏總集中佇廟埕一个所在，電子音響放盡磅，互相拚館起掠狂，吵甲頭殼強強欲焮(piak)--開！若準心內袂爽，嘛是有話無底講！規个廣場亂絞絞(kà-kà)、花嘎嘎(sà-sà)！做醮錢，烏白掖！想著人性貪婪兼奢華(tshia-hua)，世風日下，真正是使人心肝會疼！散凶人，欲按怎！

做醮近尾聲得欲煞，拜託親朋好友緊來看、食繼攤，歡迎恁逐家牽親引戚來阮遮，無論南北二路朋友弟兄，朋友的朋友的朋友，親情(tsiānn)的親情的親情，攏總來予阮請！流水宴席食免驚！管伊一擺做醮食去幾條高速公路，阮攏無愛聽！為著爭面子，廟佻廟拚，庄頭佻庄頭拚，拚來拚去，總是為著一个空殼的名！好酒沉甕底喔？「燒王船」是最後一齣上蓋重要的「王船祭」大戲，一科比一科較浪費！逐擺攏開遐爾濟錢，燒遐爾濟會食--得的物！敢誠實會保庇咱逐家平安無代誌？敢誠實會保庇咱逐家大趁錢？廟--裡主事老大有講起：歹年冬，厚天災；景氣bái，錢毋來。想無步無法度，只好做五朝、七朝清醮大普渡，拜託好兄弟仔莫(mài)擋路！順繼拜請天頂眾神明展神威，鬥排解，來守護，來相助。

阿勳仔出世就是歹命囡，今年猶咧讀高三，認分認命，認真拍拚！向望將來考牢(tiâu)大學，出業了後出社會服務，希望會當揣著好頭路，踏著好地步，趁大錢飼某囡，成家立業好名聲，會當量早出頭天，也聽(thìng)好早一日脫離散赤艱苦的日子。

倩(tshiānn)總舖師，倩廚子(tôo-tsi)師傅；請阿姑，請阿舅；普渡來，請來去！吩咐三，吩咐四，吩咐親家親姆做醮時陣來看戲。這擺庄--裡做醮，阿勳仔in規家伙仔無閒成十日，規庄鬧熱tshih-tshih。別人歡歡喜喜，特別是細漢囡仔上佻意；毋過，伊若想著三冬前做醮的代誌.....頂擺in厝--裡所欠的錢，猶未還離！這科醮，又閣共人借袂少錢！伊的目箍就紅，伊的喉管就瀆。

2001.12.31 《島鄉台語文學》

2004.7收入台語散文集《烏面舞者》

2001.11.28寫／2012.11.8修